



## **Regulativ da persunal per la vischnaunca da Tujetsch**

---

### **Art. 1 Camp d'applicaziun**

Quei regulativ regla igl engaschament, las obligaziuns ed ils dretgs dils collaboraturs dalla vischnaunca da Tujetsch.

### **Art. 2 Dretg subsidiar**

Nua che prescripziuns specialas stipuleschan buc expressivamein enzatgei auter, vala la legislaziun da persunal dil cantun Grischun e las prescripziuns dall'ordinaziun davart la salarisaziun dils scolasts. Per singulas categorias da collaboraturs resta la legislaziun cantunala e federala resalvada.

### **Art. 3 Relaziun da survetsch**

<sup>1</sup> La relaziun da lavur vegn francada cun in contract tenor il dretg public.

<sup>2</sup> El contract da lavur eis ei en cass motivai pusseivel da stipular reglamentaziuns che svarieschan da quest regulativ.

### **Art. 4 Cumpetenzas**

Tut ils collaboraturs permanents vegnan engaschai dalla suprastonza communal, il persunal d'instrucziun ed il meinascola dil cussegl da scola.

### **Art. 5 Salarisaziun e classificaziun**

<sup>1</sup> La suprastonza communal classifiescha las plazzas en las classas da funcziun tenor in plan da classificaziun. Quei plan sebase sin la scala da pagas dil cantun Grischun. Per ils scolasts vala l'ordinaziun davart la salarisaziun dallas persunas d'instrucziun dil cantun Grischun.

<sup>2</sup> Tier la fixaziun dalla paga sebase la suprastonza communal sin la scala da pagas dil cantun Grischun. Enteifer las classas da paga sa la suprastonza communal applicar il sistem cantunal ni il sistem da scalems.

<sup>3</sup> Sin fundament dil giudicament dils collaboraturs sa la suprastonza communal conceder ina midada dalla classa resp. dil scalem da paga.

### **Art. 6 Classas e categorias da pagas**

<sup>1</sup> Sche la situaziun economica ni las finanzas communalas pretendan, sa la suprastonza communal ordinar per tuts collaboraturs ina bloccada digl alzament dallas pagas.

<sup>2</sup> Malgrad ina bloccada generala digl alzament dallas pagas sa la suprastanza communal en cass specials tuttina conceder in augment dalla classa resp. dil scalem da paga.

### **Art. 7 Renconuschientscha per prestaziuns extraordinarias**

La suprastanza communal sa conceder per prestaziuns extraordinarias e sin fundament d'in giudicament personal ina renconuschientscha. La cumponenta da prestaziun munta maximalmein a 5% dalla paga da basa corrispundenta dil collaboratur.

### **Art. 8 Sururas**

Sco sururas valan per regla mo uras da lavur che vegnan ordinadas dallas autoritads superiuras ordeifer il temps da menaschi regular ni duront ils dis libers. Sururas ein da principi da cumpensar. In'indemnisaziun finanziaria dallas sururas ei pusseivla mo en cass excepziunals.

### **Art. 9 Indemnisaziuns specialas**

La suprastanza communal regla l'indemnisaziun supplementara dil temps da lavur duront la notg e la fin d'jamna sco era l'indemnisaziun pil survetsch da pichet.

### **Art. 10 Obligaziun da domicil**

Ei vegn giavischau ch'il personal communal prenda domicil en vischnaunca.

### **Art. 11 Vestgadira da survetsch e da protecziun**

La suprastanza communal regla il dretg dils collaboraturs per vestgadira da survetsch e protecziun.

### **Art. 12 Indemnisaziun dallas spesas**

<sup>1</sup> L'indemnisaziun dallas spesas (inclusiv viadis) sedrezza tenor la reglamentaziun cantunala.

<sup>2</sup> La suprastanza communal regla l'indemnisaziun per il diever da vehichels duront la lavur.

### **Art. 13 Camp d'applicaziun ed indemnisaziun dalla lavur**

Il camp d'applicaziun e l'indemnisaziun da personal accessori regla la suprastanza communal.

### **Art. 14 Ulteriuras cumpetenzas**

Aschinavon che quest regulativ fixescha nuot auter, ei la suprastanza communal l'istanza che decida definitivamein davart damondas da dretg dil personal.

## **Art. 15 Contestabladad da decisiuns da dretg dil personal**

Decisiuns da dretg dil personal vegnan decididas dalla suprastanza communal en davosa istanza, exceptiu il cass ch'igl ei previu da recuorer alla Dertgira administrativa dil cantun Grischun.

## **Art. 16 Activitads accessorias ed uffecis publics**

<sup>1</sup> Activitads accessorias astgan buca impedir d'ademplier las obligaziuns prescettas el contract da lavur.

<sup>2</sup> L'execuziun d'ina activitad accessoria d'interess public sco era occupaziuns accessorias pagadas, per las qualas ei vegn impundiu ordeifer la lavur mintg'jamna dapli che quater uras, drovan l'autorisaziun dalla suprastanza communal, resp. dil cussegl da scola.

<sup>3</sup> Sch'ina activitad accessoria coincida cul temps da lavur, eis ei da cumpensar quei temps ni da reducir il pensum da lavur.

<sup>4</sup> Uffecis publics ni mandats da tuttas sorts che savessen collidar cun ils interess dalla vischnaunca ni restrenscher la prestaziun da lavur, drovan il consentiment dalla suprastanza communal, resp. pil personal d'instrucziun e pil meinascola dil cussegl da scola. La damonda corrispondenta ei da far avon che surprender talas funcziuns.

## **Art. 17 Obligaziun alla discreziun**

<sup>1</sup> Tuts collaboratur ein obligai a discreziun pertuccont ils fatgs confidai ni surdai ad els en lur uffeci ni survetsch e ch'ei per motivs ufficials ni privats superiors buca destinai per tiarzas persunas. La discreziun vala era suenter che la relaziun da lavur ei dissolvida.

<sup>2</sup> Tuts documents surdai ad in collaboratur duront sia activitad per la vischnaunca ni elaborai dad el duront quei temps s'audan alla vischnaunca e restan suenter la fin dalla relaziun da lavur en possess da quella.

## **Art. 18 Reglamentaziuns divergentas dil dretg cantunal**

Las suandontas prescripziuns dalla lescha da personal (LP) e l'ordinaziun da personal dil cantun Grischun (OP) valan buca per la vischnaunca:

- Art. 31 LP Fond d'assistenza per il personal
- Art. 39 LP Prevenziun professiunala
- Art. 40 LP Indemnisaziun da partenza
- Art. 53 LP Domicil, habitaziun da survetsch
- Art. 61 + 62 LP Cumissiun dil personal: Incumbensas, cumposiziun ed elecziun
- Art. 63 - 68 LP Cumpetenzas, protecziun giuridica e procedura
- Art. 69 + 70 LP Camp d'applicaziun/Indemnisaziun da lavur
- Art. 24 + 24a OP Fond d'assistenza per il personal e fond da persistenza
- Art. 42 OP Premias, prestaziuns d'assicuranza ed inhabilitad da luvrar
- Art. 44 OP Cassa da pensiun: Repartiziun dallas contribuziuns
- Art. 44a OP Extensiun dil plan da prevenziun
- Art. 44b OP Capital en cass da mort
- Art. 45 OP Indemnisaziun da partenza

## **Art. 19 Vigur ed aboliziun**

<sup>1</sup> Quest regulativ entra en vigur igl empren da schaner 2023.

<sup>2</sup> Il reglament da persunal dils 27 da november 2006, il reglament da salarisaziun dils 27 da november 2006 ed il reglament da spesas digl 1. da schaner 2007 vegnan aboli.